



C40
4514
48



C40-4514

了翁上座請大藏及有
家書置之武州紫雲山
我微安塔院庶府中未
為學者不敢許出院內
當山二世鐵牛機謹誌



B 64853

乘頂王經

梁優禪尼國王子月婆首那譯

歸命夫智海圓滿淨覺尊

如是我聞一時佛在毘舍離菴羅樹園與大比丘僧
八百人俱菩薩摩訶薩十千人俱及諸天龍八部鬼
神爾時世尊食時著衣持鉢入毘舍離大城乞食於
其城中次第遊於淨稱里巷爾時淨稱里巷有一童
子名善思惟乳母抱持在於高樓重閣之上手執蓮
華娛樂受樂以宿善根即向乳母而說偈言

如是音樂聲 世所未曾有 母今速放我

我欲至閣下 必是大精進 世尊大光明
我欲投右足 因陀枳羅邊 微妙甚可樂
衆鳥悉圍遶 此聲昔未聞 二生未曾覩
必是大精進 憐愍衆生故 以右足而蹈
因陀枳羅邊 如母著瓔珞 貫之嚴其身
未觸出妙聲 令人意所樂 必是天中尊
功德光莊嚴 放右足而下 因陀枳羅邊
如人擊銅鼓 出於大音聲 於其一切處
皆得聞此音 必是人中日 大牟尼光明
入此大城中 利益諸衆生 如樹生華時

種種華莊嚴 隨意出妙音 令衆生貪著
必是大龍王 善住天中尊 我欲右足躡
因陀枳羅邊 如空淨無垢 周徧無塵翳
光燄如金色 令日光不現 必是樂見者
具足光明尊 放右足而下 因陀枳羅邊
如此諸天衆 住在於空中 歡喜而讚歎
旋轉在空中 必是利世者 最勝天中尊
放右足而下 因陀枳羅邊 如此城衆生
悉生於慈心 各各意相謂 如母子相親
必是功德聚 功德華莊嚴 放右足而下

因陁枳羅邊 如男子女人 持種種妙華
滿掬而侍立 歡喜相瞻視 必是人中龍
功德華莊嚴 右足下而蹈 因陁枳羅邊
天華及人華 滿於虛空中 散以續紛香
令人心愛樂 必是大精進 欲淨毘舍離
無上尊入城 利益諸衆生
爾時乳母聞子語已驚怖毛豎卽將童子至於樓下
而作是念向所言之者爲是誰作爲是天也若龍夜叉
羅刹鬼神緊那羅羅乎摩睺羅伽爲是人也還住本處
而不移動

爾時世尊至其門已時彼童子見佛世尊在其閣下
瞻仰如來以佛神力在虛空中卽向世尊而說偈言
世尊住大智 安住無上人 憐愍諸衆生
願受此蓮華

爾時世尊以偈答童子言

我住於實際 非世間境界 其際無有際

此是實際相

爾時善思惟童子以偈問言

云何住於際 實際中導師 其際無有際
若無云何住

爾時世尊以偈答言

若際是實際 卽際是如來 如住於實際

導師如是住 若際是實際 卽際是如來

如住於實際 童子我住然

爾時善思惟童子以偈問言

非際際爲際 其際有何相 以何方便故

名之爲實際

爾時世尊以偈答曰

無取際非際 故名爲實際 虛空是際相

其空無空相

爾時善思惟童子而說偈言

妙處是實處 處處無有上 願一切衆生

住此如導師

爾時善思惟童子白佛言世尊惟願世尊憐愍我故

受此蓮華爾時世尊卽便受彼所施蓮華如來受已

時彼童子而作是言世尊以此善根願我得成阿耨

多羅三藐三菩提爲諸衆生分別解說無凡夫法無

聲聞法爾時慧命舍利弗在大衆中語善思惟童子

言汝學何法爲衆生說爾時善思惟童子以偈答言

諸佛及聲聞 一切無得者 我學如是法

爲諸衆生說 其法世界無 亦無有言說
智者應當知 其法性如是 過去正徧知
天人無上尊 無得此法者 導師入涅槃
彼處無法界 亦無衆生界 此是無上際
非世間境界 法界但是名 名字而分別
無分別分別 分別畢竟無

爾時富樓那彌多羅尼子以偈問善思惟童子言
云何於此法 童子而修學 甚深難知處
智者於此惑 汝生來未久 智慧甚通達
與聲聞談論 智慧無障礙 處處巧明淨

如成鍊真金 如王在大衆 如月在於空
爾時善思惟童子以偈答慧命富樓那曰

汝今知已問 彼處無有生 諸法未曾生
誰受於生者 無一法生者 自性不可得
此是諸法性 求法不可得 法及於法性
二俱不可得 二俱未曾有 而佛說妙法
此是第一輪 鹿苑中所說 如拳把於空
以覺諸聲聞 法音徧一切 救度諸衆生
以得方便智 如實而演說 生老及與死
是凡夫境界 富樓那汝有 顛倒未除盡

經
五
善

生者及死者 此世間言說 無言說法中

言說是密語

爾時富樓那彌多羅尼子白佛言希有世尊善思惟童子於此甚深法中智慧通達佛告富樓那如是如是如汝所說佛問善思惟童子汝以何義求阿耨多羅三藐三菩提爾時善思惟童子而說偈言

天人無上尊 知已而故問 如牟尼所說

誰當有所求 我今無所求 而求無滯法

甚深無上句 清淨離諸漏 衆生不可得

非衆生亦然 於此不迷沒 能住於世間

若能如是知 甚深無上句 一者及異者

如上實際說 覺悟諸衆生 衆生不可得

以無衆生故 亦無覺知者 智慧及衆生

自性不可得 若能如是知 是名爲智者

世尊我如是 自然能覺知 爲一切衆生

而說無上法

爾時阿難白佛言希有世尊善思惟童子以此甚深辯才於無證無得法中而能解說一切世間天人阿修羅於此法中皆生驚怖世尊誰於此法而不修學於此深法應先修學爾時慧命阿難而說偈言

經
大
萬

善思惟童子 在於大衆中 如須彌寶山
觀者皆愛樂 譬如須彌山 安處於大海
如是善說法 世間所愛樂 非有名無名
童子之所說 所說實際法 非世間境界
如是言說時 不生驚怖心 汝今爲我說
云何如是知

爾時童子而說偈言

我不顧身命 求法無所著 如是求菩提
多聞應當知 因欲墮憤鬧 世間受諸苦
我已不貪著 見世導師故 此諸佛境界

救護世間者 今在於佛前 身無有諸過
虛空及我身 二俱不可得 若無法可得
於法有何怖 虛空及與佛 二俱不可得
若能如是忍 於法無所畏 虛空及與地
自性不可得 善思此自性 於法無所畏
善思虛空地 本無當亦無 無自性無生
畏者無自性 虛空無高下 畢竟不可得
如是知法者 於法無所畏
爾時世尊問善思惟童子言汝不畏也不也世尊汝
不驚也不也世尊佛告童子善哉善哉汝能於此甚

深法中不驚不怖爾時世尊而說偈言

若於體生畏 其體不可得 若如是常忍

其人求菩提 說於衆生想 衆生不可得

若能如是知 安住於此乘 若不得菩提

不得非菩提 更無有所得 彼則無所畏

若能如是知 不住有無中 如是汝應知

此道是菩提

是故善思惟菩薩欲速得阿耨多羅三藐三菩提欲
覺知者常想樂想淨想衆生想人想應當修學此道
能向阿耨多羅三藐三菩提我本行菩薩道時亦常

修學如是之行我得如此無上道已不得一法名得

菩提爾時世尊而說偈言

我說於常想 常體不可得 常無常無故

求之不可得 樂想衆生者 不知於樂想

此是顛倒想 分別生於人 是故彼有想

命者及以人 若有知法者 彼此不可得

非道得菩提 非道亦不得 此是諸法性

求法不可得 性及於實事 知者不分別

汝應如是知 此道是菩提 不行此妙乘

佛乘無上乘 於此生分別 是人不知法

不行此妙乘 佛乘無上乘 若不修此行
甚深定難證 諸法無實事 實事不可得
若無實事者 云何得有樂 若樂若苦等
猶如空中跡 智者如說知 其心得解脫
我說有我者 其法無實事 以無有我故
無有能知者 無有知者故 是智慧境界
是以說命想 畢竟不可得 若我若命等
自性無實事 大智能解知 少智則迷惑
性及於實事 此凡夫境界 不知此乘中
佛乘不思議 甚深修多羅 不聞不受持

於此法門中 無法可演說 我不得一法
亦無法可說 我坐道場時 不證一智慧
無智亦如是 菩提無得故 菩提及道場
說時不可得 凡夫起分別 稱言佛說法
此是微密言 甚深佛所說 若不聞此法
最勝之所說 甚深及與佛 此是魔境界
其人不知味 守護一切法 諸菩薩衆等
無不了此法 諸佛及菩提 二俱不可得
如是妄言說 稱云佛說法 如此云何有
依止於可求 若有智慧者 分別甚深法

如是信讚歎 諸佛不思議 是故善思惟
當修學深法 其法義甚深 甚深智能覺
如是言說此 言說亦無得 衆生見顛倒
此非其境界 非惟三昧故 能知於此義
三昧非三昧 於空中亦無 此非智境界
亦非非智境 應覺知此際 非是智慧境
我昔聞此法 行於甚深處 衆生所樂異
信受者希有 若不信此經 最勝之所說
多佛種善根 是人乃能信

爾時世尊復告善思惟言童子是故菩薩應如是白

莊嚴於世間驚怖處不生驚怖應如是莊嚴童子言
世尊我於今者信樂受行愚癡之人所不能信佛告
童子菩薩摩訶薩甚深之行當爲汝說諸法無諍聞
已不驚一切法斷聞已不驚諸法不斷聞已不驚一
切法有一切法無聞已不驚一切法分別一切法無
分別聞已不驚諸法有爲諸法無爲聞已不驚一切
法境界一切法無境界聞已不驚一切法歡喜一切
法無歡喜聞已不驚一切法差別一切法無差別聞
已不驚一切法有求一切法無求聞已不驚一切法
清涼一切法無清涼聞已不驚一切法明一切法無

明聞已不驚一切法有名一切法無名聞已不驚一切法生一切法無生聞已不驚一切法有畏一切法無畏聞已不驚一切法生一切法滅一切法無滅聞已不驚一切法是道一切法非道聞已不驚一切法般涅槃一切法不般涅槃聞已不驚說此法時不生驚怖爾時世尊而說偈言

於一切法中 自性不可得 以無自性故
應觀其相滅 一切法無滅 其中亦無心
一切法無故 自性不可得 一切法無諍
其心不可得 若法不可得 亦無有諍者

一切法無故 其性無有實 若性無實者
其法亦無滅 一切諸法斷 智者解不二
此稱爲斷者 非顯示於斷 一切法不斷
微塵不可得 微塵及多塵 法中不可得
一切法無故 言說中而現 如彼不可得
實有而不現 一切法無故 方便而有現
若言無實者 此則皆戲論 一切法和合
無諍故宣說 求諍之自性 畢竟無有實
一切法無合 無作亦無滅 如是不可得
遠離於諸法 一切法無得 求始不可得

以其無始故 名之爲實際 一切法歡喜
喜悅不可得 若法不可得 亦無有言說
一切法無喜 以法無二故 自性中無實
此是甚深相 一切法不動 自性中無我
以自性無故 求動不可得 無動是涅槃
求法不可得 以無有法故 故名爲涅槃
一切法無常 而說第一義 此衆生言說
名之爲分別 諸法無分別 無常無住故
衆生不可得 此是法中法 一切法如幻
其幻不可得 以性不可得 依行故言說

一切法無爲 此是其自體 以法不可得
是故名無邊 所說之境界 自體無境界
凡夫虛妄取 稱言有境界 自在說境界
亦說無境界 以其說境界 應知無境界
一切法是實 其數不可得 若身不可得
是故無異異 以其無得故 則知有所得
以有所得故 則知無所得 其中無清涼
亦無不清涼 無法無清涼 此是諸法實
諸法不可得 不可得此說 以諸法無故
則知諸法有 一切法惟名 名亦不可得

若法不可得 則知有涅槃 受及與非受
於受中而說 此中無有說 名之以爲說
非有名爲有 於有中而說 以起分別故
恒墮有無中 凡夫見幻人 取之謂爲實
有無法平等 智者聞不惑 法生及無生
二俱不可得 以下劣凡夫 故說有生法
法若有生者 是則應有滅 生法及滅法
此二不可得 一切法悉空 無法而可得
汝應如是知 我所說深法 菩提無言說
亦無有作者 若得菩提時 於三有明了

若分別菩提 不名求菩提 行及於菩提
無有分別相 一切物無生 求自性亦無
以自性無故 此是涅槃相 畢竟無有生
求之不可得 以自性無故 非滅非非滅
若知此義者 一切法自性 彼無有生故
則無有違諍 聞說甚深法 不生驚怖者
應知彼衆生 佛說爲菩薩
爾時善思惟童子以偈白佛

世尊無上師 爲我故出世 於此法中說
異想求惟名 牟尼出於世 佛生不思議

永斷諸魔網 而現正法網 我斷生死盡
不久至道場 若無異想者 以相故演說
世尊說可求 見已入涅槃 度脫諸世間
斷絕諸疑惑

爾時世尊告善思惟童子言無疑惑行是菩薩行護
念之行是菩薩行無分別行離一切過以甚深行憐
愍一切諸眾生等是菩薩行善思惟相行虛妄行是
欲相捨於欲行離諸瞋恨於一切眾生其心平等以
心不可得故行大慈行以求法故行大施行以不捨
故行無疑行以不見他故行無熱惱行以清涼故行
精進行無疲倦故行三昧行心無邊故行於智行知
一切法相故行無畏行無怯弱故行無障行成就如
來影像勝行故觀察十方一切世界以無滯行故爾
時世尊而說偈言

說諸菩薩行 遠離諸疑惑 行及於愚癡
二俱不可得 非行以爲行 是諸菩薩行
若知此行者 斯人行無礙 說諸菩薩等
護念於諸法 以求無所得 此是無上行
若說我修行 則住於顛倒 以住顛倒故
不能得無畏 此是言說行 言說不可得

若能如是知 行於無上乘 大乘無上乘
此乘無驚怖 驚怖及不驚 一切皆戲論
我說一切行 一切行皆無 若一切行無
是爲無上行 此行是甚深 護念一切法
護念及甚深 此一切分別 甚深及以行
此中二俱無 若知於此際 不分別諸法
無法可取著 無法不可著 此是諸法性
無性而演說 無堅無欲等 以求故顯說
文字不可得 此是無上句 我以方便說
聞者勿生怖 以求不可得 亦無破壞相

此諸衆生行 理實不可得 若能如是知
是名善修學 一切衆生無 故我說衆生
而衆生法爾 此道是無上 若心若衆生
畢竟不可得 此是第一義 而大慈故說
菩薩摩訶薩 世間大施主 以修常施故
故名爲施主 若法不可得 一切法皆無
是時修施者 菩薩無智故 若法不可得
於高下法中 以不驚怖故 名爲真施主
若佛不可得 法則不思議 此名真持戒
諸法無所依 佛境不思議 爲諸菩薩說

愚者不覺知 禁戒不清淨 於衆生起忍
衆生不可得 此是無上忍 於此法中說
若心不可得 亦無有分別 此是無上忍
以法不可得 若起疲倦時 菩薩應遠離
如是上精進 以名字故說 身心真精進
不著於諸法 此是上精進 爲諸菩薩說
菩薩於法中 若不起疲倦 無功而精進
勤精進無上 於內外法中 心性不可得
其心善調柔 以心無得故 攀緣及以心
自性無所有 無心三摩提 是故名三昧

善逝爲我說 此三摩跋提 若不離此法
我說善調伏 不以智慧知 法有少自性
自性及以法 此二畢竟無 不得一切法
心識之境界 不以智知法 自性畢竟無
若能如是知 是菩薩念力 行於第一義
非世間境界 一切衆無實 而爲說正法
於彼大衆中 不起衆生想 彼衆生如幻
其幻畢竟無 聞如是說時 不生於礙想
若自他等法 此二畢竟無 聞說如是法
不生於礙想 內外等無法 智者之所行

心無高下故 一切世間等 一切法無礙
猶如空中跡 法自性亦爾 如彼空中跡
菩薩如是知 名爲善通達 明了一切法
知衆生所行 衆生不可得 求法亦復然
智明了諸界 其界畢竟無 我說入此門
行於無上道 得如是道已 知諸衆生行
界及於衆生 此二俱無實 如是第一智
知於一切法 於內外法中 智慧無所著
遠離無著法 是名爲實際 此法不思議
名爲諸佛法 彼法無所有 無亦畢竟無

如是修行時 不著於此世 此智名無滯
名爲諸佛智 諸法不思議 於法理無實
以其法無故 佛法名覺者 諸佛及佛法
一切皆不著 不著於菩提 是名諸佛智
此乘是大乘 攝一切法門 度脫諸世間
世間不可得 一切諸世界 所有諸衆生
菩薩爲求法 皆親近恭敬 深觀此諸法
佛法不思議 以不得諸法 是人得菩提
菩提及以法 一切皆無相 如是觀察者
能盡於佛法 如是觀察時 於世間不著

以心不著故。能盡於菩提。

復次善思惟諸菩薩摩訶薩未具莊嚴者我今當說
若有得聞如是法門不生驚怖當知是人已近道場
近佛境界住無障礙解脫之道觀察十方心無所著
則爲諸佛以大慈大悲不共佛法不觀頂相之所覆
護聞說如是甚深法門生信樂者則爲如來悉見悉
知於此經中不信樂者如來悉知若於此經生信樂
者是佛弟子我是其師爾時世尊而說偈言

我已坐道場 道場畢竟空 以不得菩提
安住於智中 其法無障礙 法體畢竟無

若法畢竟無	解脫時乃知	於一切法中
智慧能到佛	一切法及智	此是佛所說
凡夫妄分別	說言有無著	諸佛不分別
菩薩及智者	觀察諸世間	世間畢竟無
世間空寂故	觀智亦如是	衆生及以佛
無有分別相	以無分別故	名爲無上慈
盡諸衆生界	雖爲悲所觸	其悲無實事
悲及於實事	此凡夫境界	如虛空尺寸
本無當亦無	世間亦如是	是名無上悲
此是無上法	名爲諸佛法	求之不可得

善逝之所說 導師無上尊 求色不可得
如是法無色 隨世間故說 虛空無有邊
處處不可得 諸佛法如是 隨世間故說
此無上智慧 智慧不可得 以智不可得
彼智亦無實 此岸若彼岸 以相形故說
以彼取相故 不行甚深法 當知此法中
一切皆平等 若以相說者 則非善知識
自眾若他眾 若說有求者 以取相說故
彼非善知識 若謂法爲有 除遣得無法
童子我此法 不作如是說 我以知苦故

性中無苦惱 若如是說者 不入於此法
諸法本無集 名之以爲集 若說斷於集
則遠離此法 若於此定法 本無而分別
於本無法中 本來無有滅 若以分別說
本無今何滅 童子汝當知 此見非正見
修習於道者 以求故演說 付囑於求者
於道中修學 我說諸菩薩 大智大名稱
於當來世中 能解此深義 若有持此經
最勝之所說 多種諸善根 爲諸眾生故
善說修多羅 智者能受持 是人當來世

經
大業理經

九

蓮舟

能護我正法。說於此法者。住如無分別。如此是菩提。菩提不可得。

說此法時善思惟童子得無生法忍踊躍歡喜得未曾有諸佛常法為諸菩薩授記前時現希有事爾時世尊從其面門放諸光明青黃赤白紫玻黎色此光出已徧照無量一切世界上至梵世照世界已還至佛所繞佛三匝從佛頂入是時大地六種震動爾時空中有諸天眾雨眾天華沉水末香於虛空中作天妓樂出妙音聲爾時三千大千世界清淨莊嚴如鬱單越爾時阿難從座而起整理衣服恭敬合掌白佛

言世尊何因緣故如來現此希有之事若無因緣如來則不現此瑞相爾時阿難而說偈言

無上導師人中尊 無緣則不現音變

惟願世尊為眾說 今此瑞相何因緣

諸天在於虛空中 供養最勝無上尊

歡喜踊躍而讚歎 善說微妙勝法門

譬如北方鬱單越 種種妙華而莊嚴

此諸光明亦如是 照此世界皆嚴淨

一切諸佛法如是 為諸菩薩授記前

放此妙色大光明 徧照十方從頂入

經

大業理經

九

蓮舟

無上精進牟尼尊

現此光明希有事

如來何緣放斯光

惟願大悲爲我說

爾時世尊卽爲阿難而說偈言

善思惟童子 於諸如來所 廣種諸善根

當作人中尊

佛告阿難此善思惟童子於當來世當得供養無數
億佛於諸佛所信樂恭敬以諸供具飲食衣服臥具
湯藥供養彼佛彼諸如來般涅槃已取佛舍利起大
寶塔高百千由旬一切衆寶以爲嚴飾以一切華香
寶幢旛蓋栴檀沉水種種末香妓樂歌頌供養讚歎
彼諸如來當得作佛號淨月如來應正徧知明行足
善逝世間解無上士調御丈夫天人師佛世尊爾時
世尊而說偈言

十方諸世界

珍寶滿其中

以此珍寶聚

奉施諸如來

世間無上師

世尊之所說

若聞能受持

功德多於彼

爾時慧命舍利弗以偈白佛

甚深勝法門

最勝之所說

云何各此經

我等頂受持

於此法門中

不說一法無

有亦不可得

勝法門所說

一切有漏法

及以無漏法	於此不可得	微妙經所說
一切有爲法	及以無爲界	二俱不可得
於此經中說	世尊無上師	說於一切行
一切不可得	於此經中說	佛之所說法
於此亦不說	所說甚微妙	求我不可得
十方諸世界	世尊之所說	世界無自體
於此經中說	導師無上尊	惟願爲我說
云何名此經	我等當受持	聞如是語已
佛告舍利弗	此經名頂王	其頂畢竟無
大智汝當知	應如是受持	若能受持此

最勝之言說	彼人能覺知	諸天及世人
佛說此法時	衆中百萬人	諸善根增長
悉發菩提心	以得聞此經	甚深無上法
此衆必當得	世間無上尊	於深妙法中
皆悉明了知	此衆必當得	受持此章句
若能受持此	所說頂王經	於一切法中
不生希望心	此中無一忍	亦無第二忍
若法不可得	亦無法可說	若有能受持
頂王修多羅	以觀此法故	能生於辯才
若有智女人	能受持此經	能速轉女身

經
大業頌正經
三
萬九

成就丈夫法 以一知一切 以此一切知
諸法陀羅尼 於此經中說 言說一切法
容受於一切 如是說此分 法光靡不徧
彼彼諸世間 種種名應知 於處處說者
其法不可得 法不可攀緣 求之不可得
一切法如是 總持者安樂 若法不可得
法中無有無 此是諸法性 名之爲總持
若有能持此 所說頂王經 持法之光明
徧照一切處 一切法甚深 其法不可得
若法不可得 亦無於有無 若人具智慧

辯才無所礙 乃能知此義 畢竟無有實
如阿耨達龍 處空注大雨 水非從外來
不思議力爾 若欲知諸法 分別無所礙
學此修多羅 不依一切法 於此法門中
法無所從來 一切法無生 於此經中說
譬如日光明 光無所不至 此經亦如是
徧照一切法 若辯才比丘 應受持此經
學此修多羅 微妙頂王經 速疾能得成
不思議辯才 修學此經已 能利益世間
若有於此經 能信生隨喜 總持者難得

以不知味故	比丘比丘尼	若不修行此
行餘虛妄行	去我法甚遠	於我弟子中
若能修行此	能爲世間眼	一切無與等
如忉利天王	能覆護世間	此經亦如是
能爲世間舍	如住須彌頂	見一切世間
如是住此經	觀察一切法	如夜火星流
一切皆悉見	持經者光明	一切法中勝
譬如日光明	徧照一切處	此經亦如是
能滅一切闇	如月在空中	照已而不住
此經亦如是	能照十方界	此印是法印

一切印所印	此印住世間	爲諸菩薩故
如虛空中印	本無當亦無	虛空及與印
二俱是分別	如是諸佛法	於此經中說
諸佛不可說	法亦復如是	如王命將終
國嗣付長子	勅告羣臣衆	悉以付我子
如是聖法財	賢聖所守護	付阿難比丘
爲諸菩薩說	守護持此經	爲諸菩薩故
成就善根者	此經入其手	若有能受持
演說此經者	是人必得佛	決定無有疑
若人求辯才	於法無依止	應受持演說

頂王勝法門 說於世間法 卽名爲菩提
如是無差別 通達於此經 於一切世間
此人無疑惑 能受持此經 亦爲他人說
聞如是經已 覺知諸佛法 以此甚深法
利益諸衆生 佛說此經時 諸佛皆稱讚
善哉無上尊 所說甚微妙 建此大法幢
法幢不思議 能以四句偈 爲衆生解說
此不思議經 若爲他解說 能觀無量法
法觀不思議 諸佛無上尊 永斷一切法
皆同說此經 不思議法門

爾時世尊說此偈已告阿難言若有比丘比丘尼優
婆塞優婆夷聞是法已受持讀誦爲他解說所得功
德甚多無量不可窮盡譬如虛空不可窮盡如是阿
難若人於此甚深法門受持讀誦一四句偈爲他解
說其人功德亦復如是說不可盡爾時世尊而說偈
言

無邊甚深法 此經說大義 受持稱說者
應善護此經 若以分別說 虛空尚可窮
於此經功德 說之不可盡 若受持此經
則爲已供養 十方世界中 一切諸世尊

十方世界中 所在大牟尼 受持此經者
則禮拜供養 十方世界中 十號具足尊
若有聞此經 則爲已供養 過去諸世尊
及以當來佛 十方世界中 現在人中尊
若有受持此 如來所說經 皆悉已供養
師子牟尼尊 以資生供養 此是世間智
受持此經者 無上智慧供 若人以珍寶
充滿十方界 持以施諸佛 其福德甚多
若復於此經 善學爲人說 此人所供養
佛說爲第一 我所說法中 求佛不可得

於此不驚怖 卽是供養佛 此第一供養
世間所不及 若不毀訾者 亦名爲供養
諸佛及以法 求之不可得 此第一供養
最勝之所說 然燈正徧知 以此法供養
此第一供養 爲諸菩薩說 我於彼世尊
以此供養已 然後得授記 當來世作佛
若欲求佛道 爲衆生上首 淨修行此道
而供養導師 如是供養已 得菩提不久
應修此供養 通達一切法 此第一供養
一切諸佛法 諸導師世尊 一切悉皆得

經

三

萬

得入佛境界 佛智不思議 能作師子吼
我應受世供 作師子吼已 一切法無畏
度無量衆生 入無漏涅槃

佛說此經已善思惟童子及諸比丘僧一切世間天人阿修羅捷闍婆等聞佛所說皆大歡喜信受奉行
大乘頂王經

休邑普滿禪林比丘明時 眞滿 眞空 眞
津 如吳 如惺 如燈 性慈施費全刻此
大乘頂王經 計字八千一百八十五個 茲
銀四兩零九分三厘 比丘解藏對
天啓丁卯孟冬月經山化城寺識

大方等頂王經 一名維摩詰子問經

西晉三藏法師竺法護譯

聞如是一時佛遊於維耶離奈氏樹園與大比丘衆俱比丘八百菩薩一萬一切大聖神通已達悉得總持辯才無礙攝三世慧至三達智空無相願不中取證行于大慈奉無蓋哀不計吾我已度彼岸通于三世無去來今曉一切法如幻化夢影響野馬芭蕉水泡聚沫解于三處本無所有從緣對生有利無利若譽若謗得名失譽若苦若樂已過世間之所有法因權方便周旋三塗已越欲界色界無色界解暢道義

經

大方等頂王經

一

萬

救度一切諸天來侍諮受深法開發愚心悉入道門
爾時世尊明旦著衣持鉢入維耶離城分衛至維摩
詰舍時維摩詰有子名曰善思明旦沐浴以香塗身
體著新衣手執蓮華與妻室俱上樓閣觀作妓相娛
宿命德本之所感應遙見佛來與聖衆俱入城分衛
現大瑞變以偈語妻而說雅頌歌佛功德

聞斯和雅音 同時今俱作 衆妓在其處
速徹樓閣上 大雄來不疑 護世演光曜
必以足右指 蹈於城門闢 百鳥諸禽獸
發哀悲和聲 從古未曾聞 如是諸妙響

大雄來不疑 欲導利衆生 今舉右足指
以安著門闢 我今日覩佛 猶寶瓔珞身
衆妓不鼓鳴 微妙可悅心 三千聖無疑
威德淨莊嚴 必以右足指 蹈于城門闢
譬如有大鉢 著地河水至 則聞調和音
周徧其土地 人中天無疑 大聖演尊光
佛開導世間 定來入城門 神通化衆生
猶樹華茂盛 若干色芬葩 流布極美香
大龍無所疑 誓願建立本 今以右足指
按於城門闢 普照于虛空 周徧於天地

日明爲以蔽 永不復現光 一切尊無疑

現威大晃曜 今以右足指 按於城門闔

猶如諸天人 住於虛空中 衆庶佛後從

如天侍梵王 愍傷世無疑 尊人聖導師

今以右足指 按於城門闔 今日觀城人

各慈向不恨 展轉相示談 如父母子孫

德光無沉吟 福威自莊嚴 今以右足指

按於城門闔 察男女大小 各執若干華

叉手而自歸 歡悅遙散華 大導無猶豫

德華嚴飾身 今以右足指 按於城門闔

諸天人間華 徧布于虛空 散華而燒香

其香可意悅 大勇無疑結 欲入維耶離

因化悅大衆 最勝故到此

爾時善思妻室聞說是言心中抱恐衣毛爲豎身內

和涼住於欄邊心自念言是何等神爲天龍鬼魅反

足乎真隨羅摩休勒人非人耶口宣人語在其處所

不動不搖不敢移轉時佛往詣善思童子所居里中

在於舍邊立在門前善思童子見佛世尊卽欲下樓

閣往自奉迎心中喜悅不能勝已自投樓下承佛聖

旨住於虛空以偈歎佛

聖慧尊但住人中雄愍待
用哀衆生故
惟受斯水漿

於時世尊爲善思說偈言

以住真本際 世俗所不達
彼際無所有
是爲本際相

善思童子以偈啓問佛

云何住本際 真本際化導
無明之倚際
何謂立虛無

時佛復以偈告善思曰

其際真本際 是際則如來
如審住本際

了了住如是 如際真本際
斯則如來際

猶了真本際 童子住亦然

善思童子復以偈白佛言

無際際何際 何所是際相
以何權方便

名曰爲本際

於是世尊覩見善思心欲暢了解道無處告於善思
童子以偈報曰

無際不可待 乃曰真本際
其際相虛空

虛空亦無相

善思爲佛說偈問曰

甚哉真正處 其處玄無上 使一切衆生
住如今導師

時善思童子前白佛言世尊垂愍受斯蓮華佛便受
之善思童子口自發言以是功德致無上正真之道
成最正覺爲諸衆生頌宣經典令不得至凡夫之法
不至道法爾時賢者舍利弗亦在會中謂善思童子
於善思心所趣云何所成正覺法何所像欲爲衆生
而頌宣之善思以頌答說偈言

佛志無所得 諸聲聞亦然 當成正覺
爲衆生頌宣 彼無所向說 亦復無所致

大智當解斯 本淨明如是 過去諸正覺
護世無上尊 亦不得諸法 導世因滅度
計永無法界 亦無衆生界 是則爲本際
世俗所不暢 假號曰法界 人倚相名號
亦無諸所想 便無有異業

爾時邠耨文陀尼子爲善思童子說是偈言

童子卿云何 而欲學斯法 是處深難逮
明者所迷惑 仁生來久如 智慧獨勇猛
與聲聞談語 卒對慧無畏 處處能分別
所住像紫金 立王路巍巍 猶虛空月盛

時善思童子以偈答曰

惟仁問所生	所生無所生	諸法無所起
誰當復生者	其法無所生	自然無所有
是曰本清淨	無法無所得	諸法本清淨
未嘗能得是	以斯無明慢	佛故說是法
在於仙人野	第一轉此輪	多存聲聞業
係志在虛空	宣暢法音響	爲衆多縛才
以權來聖慧	宣說如審諦	有生乃終沒
斯愚之行元	處在顛倒業	如邪耨所說
以生有老死	是爲方俗言	其法無言辭

託假造言教

爾時賢者邠耨文陀尼子前白佛言至未曾有世尊
今是善思童子深入智慧巍巍乃爾所宜獨步衆所
不逮佛言如是如是如邠耨言而無有異也時佛告
菩薩善思童子卿以何故欲逮無上正真之道爲最
正覺乎善思答曰聖尊所明故復相問用最大聖故
被弘誓大聖至仁因宣是語我身寂然不有所爲以
被弘誓悉無罣礙無所開化爾乃名曰斯深上句衆
生無人亦然其不惑斯是等能度至賢庠序深妙上
句曉了斯本真際本末其以無數無有若干解達深

妙無上章句以用法故化此衆生其行各異誨無衆
生設無衆生彼一切空無智智慧衆生本淨以達本
淨無有各異以解斯義是世間智唯然聖尊我蒙解
斯自我成正覺爲衆說法賢者阿難前白佛言至未
曾有是善思童子辯才乃深入如是乎乃能宣斯應
順妙章無所著句天上世間凡庶衆人阿須倫聞必
當恐怖不肯受學誰當信樂此深妙法往昔宿世曾
聞學是深遠之行爾乃信受於時阿難以偈歎曰
猶如須彌頂 遠現微妙好 今此善思德
在衆妙如是 若如衆山王 堅住於大海

今處斯衆中 快宣是深句 善思所咨嗟
說名不有無 亦無於本際 世俗所不覩
其辭無所畏 莫不敬歎者 惟善思說之
云何知本末

善思以偈報曰

吾以棄身命 被無罣礙鎧 志不貪正覺
爾乃曰博聞 倚欲故墮落 合集極凶禍
誰不墮災者 惟見世導師 是諸佛境界
護世所將濟 其身無所危 住於佛尊道
虛空及人身 二俱不可得 如法不可得

法壞無所畏 曉虛空佛身 眞實無處所
若成是忍辱 永悉無所畏 其虛空至地
自然無所有 是自然善思 達悉無處所
其虛空至地 善思不可得 無生無自然
虛寂無所有 虛空無有高 亦復無有下
以解了是法 彼悉無所畏

爾時佛告善思童子仁者體性無所畏乎曰佛不也
世尊佛復重問卿審不畏乎曰不也佛言善哉善
哉仁乃無畏不懷恐懼時佛頌曰

從有而生畏 假現無所有 若能解是忍

爾乃近佛道 因人想有畏 衆生本永無
若能解如是 於斯無所住 其不得正覺
無覺亦如斯 若餘無所獲 此當無所畏
若能曉了斯 不住有無際 善思解如是
是爲由佛道

佛告善思若有菩薩疾欲永安逮無上正眞之道爲
最正覺者便當消除有常想安想苦想衆生之想人
壽命想分別解了無所著行悉無所倚作是慕業逮
成無上正眞之道也佛往宿世行菩薩業時作是行
道已便懷來慧無能得法乃曰佛道時佛頌曰

解常想猶幻	計常致生死	常無常虛無
求業無所有	衆生有安想	了不安自然
是想爲顛倒	用想有人故	若解了法者
無有各各異	則不懷妄想	無命無有人
道明不得由	無道亦復然	是乃曰本淨
法無所有故	若有明達者	曉有悉本淨
善思當解斯	是爲道正道	不行于道乘
佛乘所救濟	若有人諍斯	便不暢道法
不行於慧業	不爲道所護	用不順此行
佛法深難解	諸法無所法	本悉無形貌

所有亦虛無	三界永不安	計諸樂衆苦
猶如行虛空	若能思是行	斯乃心解脫
有身云吾我	彼法亦虛無	其不有吾我
所知無所有	斯等不想命	不得究本末
虛無想真實	少明爲迷惑	吾我及壽命
本淨無所有	愚冥之所行	計本淨而有
佛道無思議	不念是所有	若聞深妙法
不能受奉持	未曾有頌宣	如是經法者
法不可逮得	所說亦無獲	坐於佛樹下
因是成道慧	若不致道慧	則亦無所知

佛道及慧場 亦無有言說 凡夫懷妄想
慕佛所演法 斯則真實教 佛所宣深法
其意覺甚深 是爲魔所行 若有得聞是
佛所說經典 不解經義味 諸法所救護
菩薩甚勤苦 不求道安隱 於斯無道覺
是二事無像 意當倚慕斯 有是佛所說
是何此云何 著於顛倒業 若有遇苦惱
甚著於深妙 各稱舉大音 快佛無思議
佛復告善思學是法者當習深典勿得志存雜句多
辭無益之義不成正真無極大慧深遠之法乃曰優

奧是乃應法斯曰無得衆生墮邪不能行斯不用三
昧可解利義慧無境界無慧亦然當了斯際非智所
行佛往宿世聞是深法以解寂靜心無所著若聞斯
典得悅豫喜曾於無數佛所造行立功勳德受著心
懷諷誦奉行以化他人宣布十方佛復告善思童子
菩薩當修如是弘誓世人所在常抱恐畏勤學至真
不當懷懼也畏難退却當作是解宣布奉行乃入道
慧善思前白佛言唯然信樂也世俗所不信獨篤無
窮志曠如空永無所慕佛復語善思若菩薩大士志
深妙法斯諸正士以是方便順如佛教則於道法無

經
所諍訟以不諍訟一切諸法則無恐怖皆不可斷一切諸法了之本無志無所慕便入道慧若有聞說一切法有不以爲怖若說言無不以爲懷於有無法不以增損聞諸法應諸法不應諸法精進諸法懈怠解是一切十方諸法慧所歸趣若無所趣若復不解諸法有念諸法無念不以恐怖諸法有爲諸法無爲諸法有界諸法無界諸法欣喜諸法無喜不以恐怖一切諸法亦不有爲亦不無爲一切諸法本有所有本無所無諸法寂然諸法憤亂不以恐怖諸法顛倒無有顛倒諸法虛無真實無爲不以恐怖諸法一切有

戒無戒有明無明有名無名有興無興有畏無畏有生無生有死無死不以恐怖諸法有道諸法無道諸法有度若不滅度諸法是非不以恐怖所以者何諸法皆空虛無不真猶如幻化泡沫芭蕉影響野馬夢中所見本無從來去無所至猶如虛空忽現雲霧塵煙灰等託現虛空不能爲垢忽然便滅虛空自然亦無所淨有道無道世俗慧明普解自然乃無所著了無所了乃應道慧無上正真無所恐畏心不懷懷佛於是頌曰

諸法無所有 自然虛不真 其自然虛無

是相便滅度 諸法無所諍 斯亦無所有
以了諸法無 達不有自然 所諍訟諸法
是亦無所有 以曉法空無 則解不諍訟
諸法無所有 本淨永無形 本淨不可得
亦無所忘失 斷一切諸法 故曰爲明智
斯謂永毀壞 亦現無所壞 諸法無所滅
計亦無起立 亦多無所壞 法亦不可得
諸法本虛無 亦不可得見 設使無所得
方便現所有 諸法無所有 因緣從對生
所有無所有 頒宣於經典 諸法能相應

示現無所諍 不諍爲自然 究竟無有形
諸法無所應 無作不滅度 如是不可得
常離于諸數 諸法不可得 亦無有過去
甚哉永無實 乃曰本實際 諸法皆悅豫
亦不可悅喜 若法不可得 彼亦無言說
諸法無放逸 二俱無所有 自然無可取
是爲深妙相 諸法不可知 無我而自然
以解無志求 至於自然號 無爲無所樂
彼亦無所有 用有無明業 因號曰無爲
若念於諸法 寃暢不可見 此則真實言

故名曰意念。不念於諸法。無住無所歸。
 了斯無衆生。是號法中法。一切法猶幻。
 其幻無所有。以法無明故。因宣說生死。
 諸法無形貌。是其自然義。若無有諸法。
 解脫無解脫。假號曰境界。自然無境界。
 愚冥所倚著。故名曰部界。

佛復告善思色痛想行識空本無所有眼耳鼻口身
 心空本無所有地水火風空本亦無形因緣合成猶
 如五事成其屋宅何謂爲五一曰材木二曰瓦草三
 曰土壘四曰人功五曰泥水以是五事乃成爲屋本

各別時都無屋名因緣合成身亦如是五陰緣對便
 有四大因名曰身地水火風各緣來合猶屋四柱四
 壁皆因緣會合成散壞皆無處所猶如夢中見屋宅
 城郭樹木華實流水田地犁牛諸種下其五穀各隨
 時生人主用意獲之自給心神無明不達一切三界
 皆空因倚望求便生意識十二牽連往來周旋輪轉
 無際勞於神識沉迷五趣無懈怠時不解本空如夢
 所見覺不知處何所歸趣至成正覺乃了五趣本無
 處所獨步無畏佛於是頌曰

色痛想識空。眼耳鼻口意。本寂無所有。

地水火風異 了界得自在 頌宣無部章
所言上佛土 其境滅度想 諸法各有形
本亦無合會 不曉知空寂 其本無有身
無得不可逮 從緣對合成 無獲不可致
又現望得生 在彼不修戒 亦復不犯禁
無行無有戒 是爲諸法相 諸法無所有
因無明而生 以有無明法 便造明達智
諸法假有名 是名無所有 假號無有法
乃名曰滅度 所起無所生 因現有五陰
其陰無所見 因號有所現 所有無處所

因變示有法 離生死業 長無生死難
如幻師化形 愚冥謂有人 所有無所有
明者不爲迷 法生無所生 慧者無是計
諸法皆悉空 愚者不解此 法適有所生
便當有終歿 其生及病死 捨是無所畏
諸法一切空 法亦無所歸 善思當了斯
是佛所演法 正覺無所作 則爲不可逮
若不得道處 乃見三界事 若望想佛道
則不求正覺 若行志求道 永不造無想
諸生死自然 不觀自然法 自然無所有

是爲無爲相 究竟無所生 所說不可得
以行無明業 因示無爲法 以懷來衆義
諸法則自然 彼悉無所生 便無諍訟事
彼無不奉行 所宣深妙法 用一切起生
菩薩行愍哀

爾時善思以偈答世尊曰

佛興出現世 皆用愍我等 身以爲疑網
宣布是法義 佛出無思議 爲具足興變
以壞魔羅網 說除六十二 以絕生死源
因坐佛樹下 永無有沉吟 宣消衆想著

解暢虛僞業 能仁滅諸見 勇猛爲世俗
斷我衆狐疑

爾時世尊告善思童子菩薩所行未曾虛妄多所救
護以恩加濟無有諍訟除去衆瑕一切無穢愍傷衆
生行深遠義不懷妄想世尊堅固消去貪欲無貪欲
蠲棄衆結常行等心加於衆生志不虛妄大慈之行
法不可得修大義吼不捨精進心行至真不失勤業
無有燒害奉行忍辱而不諍訟無所覩見夙夜遵行
善思一心棄于懈怠成就道行定意正受其心寂靜
修於聖慧一切諸法永無所得行無所畏心不怯羸

顯發道心行無罣礙成就如來十種之力當以何行至殊特業遵其至慧奉無等倫遊於十方諸佛世界行無罣礙度脫一切佛時頌曰

行無虛妄業	是諸菩薩辭	以奉於脫門
不畏諸礙行	無行謂正行	是菩薩之業
若能解是行	則無所貪求	以法救攝之
諸菩薩所宜	其無所得義	是行爲無上
言吾行道法	則住於顛倒	以住顛倒業
便得有所畏	假使有諍訟	不見諍所在
明者作是達	行於無上乘	是乘無所畏

大乘最無極	畏與無所畏	是亦無放逸
一切無所有	衆行中最勝	設了悉虛空
彼行乃無上	斯行甚深妙	救護一切法
所濟亦深遠	消除衆妄想	所行邈玄妙
二俱無處所	若能知本際	不倚念於法
法永無眾垢	亦不離垢去	是法本清淨
反宣捨於欲	而示現邪逆	愛欲不堅固
不轉文字業	斯句爲無上	不著猶如幻
此則無言教	以棄反倒行	便無諍訟意
一切衆生行	是實不可得	若能曉了斯

此行乃善教 衆生以無明 故曰名黎庶
衆生法亦如 是道則無上 其念及衆生
是永不可得 此爲第一慈 歎慈乃無極
是曰世大施 斯乃爲大士 常慕樂捨
乃曰慧道心 正使不得法 諸法虛無實
云菩薩明遠 是曰好布施 解法不可得
便無所恐懼 無尊是諸法 乃曰爲布施
法見不可獲 佛法不可思 是戒無所犯
諸法無所著 佛土不可議 此不見諸界
於戒不妄想 諸菩薩所歎 能忍諸衆生

一切不可得 佛所教訓誨 是法第一忍

佛復告善思色空不可得痛想行識空亦不可得所謂空者色則爲空無復異空痛想行識空無復異空四大五陰十八諸種三界本空十二因緣無則爲空無復異空現世度世有爲無爲四大皆空無復異空色如聚沫痛癢如泡思想如芭蕉生死如夢識如幻三界猶化五趣如影所以如影從緣對生三界本末欲界色界及無色界心意所爲猶如畫師治素壁板因緣合成猶如飛鳥飛行空中菩薩如是行無妄想遊到十方猶日宮殿行於虛空不汗衆冥菩薩如是

獨步三界心無所著去姪怒癡三毒窈冥猶如蓮華
生於泥水不與其合菩薩如是在於生死成最正覺
心淨如空永無所著度脫一切佛時頌曰

其心不可得 則無有諍訟 若不得衆生
是爲第一忍 菩薩離懈怠 其志無所行
永無所勤修 乃曰最精進 其心及心意
所遣真無邪 菩薩無所說 是第一精進
若有懈怠者 菩薩化立之 無心無所行
住第一精進 其心不可得 內外無所著
若心無可逮 是則爲定意 心常自勤修

自然無所有 無思無正受 乃曰逮三昧
所以言定意 以能作是行 安住名自然
是第一定意 不知慧所在 何所自然法
自然及與慧 二俱無所有 是法不可得
斯識行正法 不以識知法 自然無所有
若有了此行 菩薩意堅強 行第一之義
世所無所趣 衆會無等倫 爲衆而宣法
斯等雖遊居 無衆生妄想
佛復告善思一切諸法猶如幻化幻化本空悉無所
有迷惑愚俗自計已身及與他人悉有所有故沉五

趣敢能曉了是悉無所畏諸法本末無有內外以了如是心不怯弱不難三界三界悉空若有菩薩曉是本無獨步三世而無所難達於生死猶如虛空無形本亦無名一切諸法亦復如是無形無名用無明故馳逸三界輪轉無際猶如五事住於虛空不能爲垢自然之故心本清淨權未卽解便有三毒五陰六衰客塵所蔽雖有是非不汙本淨心亘開達暢三世空便入大道佛時頌曰

衆生猶如幻 其幻無所有 所宜如是者
永無所復畏 已身與他人 二俱虛無寂

以能曉了是 則永無所畏 其內及外法
不計有所在 無以怯弱心 不難於世俗
諸法無所礙 猶如遊虛空 所至如虛空
是法爲自然 若能曉了斯 菩薩無所畏
分別一切法 解了衆生行 彼不得衆生
其法皆如是 以剖判諸界 其界無所有
是曰入道行 斯曰無上道 以致此至業
知衆生心行 諸界及衆生 二俱無所有
以念彼如是 皆了一切法 其內及外事
無合會妄想 以爲不除法 乃曰真本際

斯法無思議 乃曰爲佛法 此悉無所有
悉亦無所成 所行能如是 計數無有人
以無爲定慧 乃曰爲佛慧 是乘爲大乘
普安於一切 永不畏此世 世亦無所有
其在於世界 普世一切界 菩薩無所行
求於無上慧 是法爲深遠 佛法不可思
若法無可獲 是則近佛道 其佛及經法
此一切悉無 若行如是者 則得近佛道
以行如是者 俗人無與侶 其心無所著
彼乃近佛道

佛復告善思若有菩薩大士聞是深經若讀持諷誦
心不恐怖善被弘誓心如金剛疾近佛樹坐於道場
入佛境界得逮至真無礙脫門觀于無爲無合會處
到於十方諸佛世界逮習大慈無蓋道哀成十八不
共諸佛之法三世最尊慧踰日月德無等侶慧過虛
空道明巍巍不可爲喻逮無邊聖無見頂相若有聞
是無限雅典典以斯深卷爲人頌宣而信樂者往過去
世曾見諸佛亦不可計又不輕慢戲笑之者佛以豫
見觀其人本早信此經如來久覩若不信樂習斯經
典聞之調戲則外異學諸魔官屬放逸之人也信是

法者是佛弟子佛則是師爲親成就下其鬚髮而作沙門其不信者則外邪業九十六種反逆道法佛時
頌言

見佛坐樹下 行於真道場 其不信佛道
是慧不可得 其無罣礙法 究竟不可得
了法無處所 是曰爲解脫 意入於聖慧
一切法之主 諸法及道慧 非佛之所宜
有爲及無爲 愚所發妄想 諸菩薩無想
諸佛大聖明 普觀於斯世 世悉不可得
所用曉了世 是亦無處所 佛聖及衆生

於是無妄想 其無思想者 善哉慈無上
假使衆生界 法界亦復然 是乃名之曰
菩薩無所著 以觀於悲哀 其哀無形見
其哀以無見 非愚所了行 五事在虛空
不有無處所 一切俗如是 是乃無上哀
其無上正法 乃曰爲佛法 此無所貪世
是爲自然法 護世之所照 其色無所有
以是無色法 乃曰無見頂 虛空無有邊
普平不可獲 是爲佛正法 名曰無能觀
其慧不可逮 是無上大道 慧以不可得

經
斯無有堅固 此際及彼岸 所見若不見
深解不行斯 是非妄想求 念是智慧法
斯法則平等 違此佛教法 則非善親友
無勤若勤度 乃曰到虛妄 其不行平等
則非善親友 以發興斯法 若復滅斯法
此等諸比丘 不善思佛教 以能斷眾苦
本淨無所有 如是說法者 則頌宣佛教
佛復告善思若說諸行皆從習致用三界習故修道
習有計吾我故行大慈修無蓋哀倚於三界行三脫
門慕四大故行無常苦空非身以生老病死求四無

畏用十二因緣了十二部經以十八種行十八不共
諸佛之法用十方眾犯十惡故行十善求十種力用
三蔽故致三達智著六情故行六度無極六通獨步
應病與藥使濟危厄佛猶良醫經法如藥用疾病故
而有醫藥無病則無藥一切本空無形無名亦無假
號心等如空無比無侶忽然無際爾乃應道佛時頌
曰

其無所住法	於中習所行	頌宣消除
去佛法大遠	若於斯寂法	造虛妄思想
以虛妄之法	不親近滅度	其宣於諍說

斯爲之滅度。善思當了是。斯無正見行。
若有修行道。宣布反逆事。用反亂顛倒。
是爲學者業。佛所演講說。菩薩大名稱。
當來諸就學。故勸化行道。若有奉持是。
佛所化深妙。用一切衆生。以爲供養佛。
若有明智者。受持是真法。斯等將來世。
用正法存立。其不行是法。心立存思想。
自謂則應慧。不用餘致道。
佛說是經時。善思童子尋時逮得無所從。生法忍。欣
然大悅。踊在虛空。去地四丈九尺。時佛欣笑。五色光

明巍巍甚妙。青黃赤白紅紫之色。從佛口出。照於十
方。無量佛土。還繞佛三匝。從頂上入。六返震動。是三
千大千世界上。虛空中。天雨細擣。栴檀雜香。木蜜衆
香。雨天好華。晃曜人目。箜篌樂器。不鼓自鳴。莊嚴虛
空。周匝十方。靡不校飾。此三千大千世界。羅列諸寶。
交露瓔琦。妙帳高閣。樹木流水。浴池五音。俱發和雅。
悲哀聞見。此變莫不悅豫。得未曾有。賢者阿難。卽從
座起。偏露右臂。更正衣服。長跪叉手。前白佛言。以何
緣笑。旣笑。當有意以偈歎佛。

聖尊未曾妄。大明不虛欣。慈愍世雄說。

何緣而欣笑 天處虛空中 供養人上上
各口而歌詠 快哉宣經典 如高燈電光
若干色微妙 斯曜亦若斯 光光照遠近
如諸佛之法 授與正道決 還繞身三匝
忽沒於頂上 聖尊笑暉曜 若干種光色
出佛口入頂 惟說此瑞意

爾時世尊爲賢者阿難說頌曰

善思族姓子 造立德無量 當成如來覺

逮致天人尊

佛語阿難是善思童子當值不可計會億姪兆佛世

世隨侍未曾遠之常用至心供養諸佛衣被飯食牀
榻臥具病瘦醫藥佛滅度後供養舍利興衆寶塔高
四萬里以持舍利著衆寶塔奉事供養以好名香衆
華衣服衆妙若干種寶妓樂幢幡梅檀雜香以解脫
華及衆繒綵以用供事諸如來至真等正覺最後末
世當得佛道號無垢光如來至真等正覺明行成爲
善逝世間解無上士道法御天人師號佛世尊爾時
大聖卽說頌曰

若以衆雜寶 充滿十方界 以用施諸佛
護世衆如來 若聞是經典 德多過彼施

經 卷之三

住力講說法 護世照三界

爾時舍利弗聞佛所說歡喜心悅得未曾有念佛至
聖德踰須彌慧超三世道不可比如空無侶探古知
今所觀無限智明曠然無以為踰救厄通明猶空無
際一切蒙慈時舍利弗念佛恩德恭恪說偈而歎頌

曰

是經甚深妙 護世之所宣 不說其名號
云何知其稱 古來未曾聞 頌宣於斯法
彼不得住處 甚哉說法快 假使有漏法
及與無漏法 計亦無所得 甚哉快說法

若令有為界 及與無為界 斯二無所積
是經歸如斯 護世宣妙法 道行正真教
觀不得處所 此經義如是 所說諸佛法
於斯無所歎 吾我不可得 甚哉快說經
設使十方界 自然無所有 護世之所宣
未及此經趣 惟愍世宣之 人中最願演
頌宣是經名 今所未稱號
佛告舍利弗是經名頂王當共傳號大智當了所以
名頂王如須彌頂皆見四天下解是經慧得四無畏
無上大道無生老病死度三世厄若世人好喜是法

經 卷之三 三十一

十方靡不蒙濟故名頂王當奉持斯若有持此佛所
宣經當爲世護諸天人百億衆興無數德無上
正真不爲緣覺及聲聞宣是法必得成就無極世護
以得聞法深難究暢處處義解了是法深奧無上當
得成佛以能奉持於一切法無復狐疑若受斯經所
宣至化所喻頂王不但當得第一法忍第二第三具
三忍法其法不可得道無處所無所光顯乃布大道
於一切法此人無欲現在無求若持是經佛所頒宣
頂王言辭諷誦化人福不可量若有女人受持斯經
以行智慧疾得殊勝捨女惡態知一切一以知衆一

便持是法頒宣斯經入諸行業明了一切諸所歸趣
以入此法說多所照知若干品所行精進無數衆人
悉受道教本空無法所可頒宣皆無處所悉不可得
所以者何本末空故從古以來義不可逮一切法然
奉持是門法無可得則不有無是本淨法乃名執持
其慕斯光無量普明當以隨時講是頂王廣求法界
志斯光目不得境界乃曰執持諸法甚深法不可得
若不可得則不有無辯才具足志存佛道覺亦若斯
以暢經義無卷無形如龍化生先興其雲然後乃雨
心無從來因緣合成斯慧無形是無思議若欲宣布

無央數法當學斯經解一切空無所著法思惟經典
不知從來所說甚善斯法無生如經所傳其光玄照
猶如日明光無從來去無所至經典如是照諸所有
令無所有若有比丘執持辯才清淨無斷當以至心
學是頂王因法光明所曜無量諦廣布法疾得逮入
無礙辯才以學頂王饒益世俗其不學此不知法味
無玄妙典頂王無上若無上若不奉是遠佛法教諸
比丘衆若比丘尼若不從是法典訓誨不歸義趣其
不求是不至正真若有比丘比丘尼求歸是法爲一
切世而作法目一切諸法悉不可喻猶如有人住切

利天處天宮殿悉見天下學斯經者普超衆生濟度
一切若住須彌頂在於其上觀察天下斯經如是解
暢諸法觀一切無開導衆生猶如有人執大炬火入
于冥室消除窈冥斯經如是以法光明普照諸法習
持是典未曾遭冥猶如日光出照天下靡不周徧斯
經如是以道法明咸曜三界一切衆生示以道慧猶
如月殿遊行虛空而不休廢斯經如是照十方界一
切蒙荷是則法印印一切法建立斯印爲諸菩薩又
計其印猶如虛空悉無所有不可令有虛空及印是
二無妄佛與正法亦復如是頒宣是經亦無所說猶

如國王所愛敬子欲立太子任以國事王告大臣以是洪業付其太子又斯聖才天下國土一切萬民委任繼後諸臣奉命今斯經法亦復如是善思童子從佛啓受當以授與無數菩薩使入上法佛以建立是經法要諸菩薩故也熾盛德本若以手執福不可量其持是經所宣頂王不當疑是不成正覺欲逮辯才於一切法而無所著當學斯經所宣頂王所云世法是則正道所以者何俗人信道若入此經或復不信用聞經恩會久成道若受是經廣爲人說皆謂至賢普世諸人莫能虛欺解諸佛法饒益衆生世護無上

若說是經諸天億千住於虛空而嗟歎言善哉正覺所宣甚哉難及難及乃說妙典是舉道英慧英所益不可思議若四句頌爲人講說若復精學無央數經以是深法不可思議廣爲人說其人蒙慈爲與佛談愛樂聖典以爲宣傳斯頂王法訓誨經典無上道要是乃名曰不可思議佛告阿難若有奉受如是像法淳熟經卷持諷誦讀若有比丘比丘尼清信士清信女能從啓受持諷誦讀其德無量功不可限莫能稱載得涯底者猶如虛空不可得際如是阿難若受是經雖不能多受四句頌諷誦宣布爲他人說福不可

計德無涯底無邊無際不可爲喻佛爾時頌曰
虛空尚可度 衆相可窮說 斯功德福祐
不可竟盡極 奉十方世界 諸無上護世
若有受持是 爲供斯諸佛 若觀諸神通
舉十方世界 不如聞此經 普奉是諸佛
其於十方世 棄捐第十業 以斯奉事佛
聞不如供養 若供諸滅度 及當來正覺
於今十方土 現在天人尊 一切有爲業
歸大仁師子 若持是經卷 正覺所宣說
若以衣食養 斯非精智慧 其有持是業

此慧供無上 一切十方世 滿中衆珍寶
以施諸正覺 是福不殊特 其有學是經
頂王所頒宣 斯供養諸佛 是所宣第一
我所宣經典 不著諸佛道 其心倚於是
欲供養如來 其不倚世俗 是第一奉事
都無舉無下 是乃曰供養 其佛正覺法
一切不可得 如來所頒宣 是第一禮敬
其錠光諸佛 所供養奉事 見諸菩薩法
是第一供養 是供養第一 如奉佛世尊
從其授決已 當得致正覺 欲住於佛道

正覺衆生尊 習是清淨法 則供養導師
 以如是供養 得道無所至 愍衆生奉法
 皆趣一切慧 十方諸佛法 護世所敷演
 是皆歸趣正 是第一供養 以得入佛界
 佛慧不可議 便能師子吼 亦如我今日
 因其師子吼 在諸法勇猛 濟脫億載衆
 減度無有漏

佛復告善思受斯經典宣布十方一切受持奉行正
 法無極大慧開示同學令得習行六度無極救於三
 界若族姓子及族姓女受是經典爲他人說德不可
 量猶如虛空不可限度佛說如是善思童子一切聖
 衆諸天龍神諸阿須倫世間人民聞佛所說莫不歡
 喜作禮而去

大方等頂王經

音釋

邠悲巾切 擊古歷切未 邈莫角切 瑋九魚切 瑋渠切
 也燒磚也 遠也 瑋王也 瑋渠切

休邑覺慧禪院比丘明華眞融如上施贊刻此
 大方頂王經卷一 計字一萬零二十二箇
 該銀五兩零一分 比丘平江對
 崇禎元年仲冬徑山化城寺識



三

卷之三

三

音釋

大大學東王經

釋名

樂清天樂無音因於音世間人為調音世間樂
其音吹法空不百列與調音城其音成重千一

0
1
2
3
4
5
6
7
8
9
200
1
2
3
4
5
6
7
8
9
210
1
2
3
4
5
6
7
8
9
220

十一
七

0
1
2
3
4
5
6
7
8
9
200
1
2
3
4
5
6
7
8
9
210
1
2
3
4
5
6
7
8
9
220